


M





Von der freyheyt
eynes Christen
menschen.

Martinus Luther.

Czu Wittenberg: Im
XX. iar.



Dem fürsichtigen vnd weysen

hern Hieronymo Adolphordt Staduoget
tzu Zwickaw meinem besondern gun-
stigen freund vnd patron / Ent-
pichte ich genant D. Mar-
tinus Luther Augu.
meine willige dienst
vnd alles
gutes.

Ersichtiger weyszer herr / vnd gunstiger
freund / der würdig Magister Johan Egran
ewer loblichem stadt prediger / hat mir hochge-
preyszet ewer lieb vnd lust / so yhr tzu der heyligen
schriffte traget / welch yr auch emssigklich bekennen
vnd fur den menschen tzu preyszen nit nachlasset.
Derhalben er begeret mich mit euch bekant czu-
machen / bin ich gar leichtlich willig vnd frolich
des beredt: dan es mir ein sondere freud ist tzu ho-
ren / wo die gotlich warheit geliebt wirt / der leyd
souil / vnd dye am meysten die sich yres titels auff-
werffen / mit aller gewalt vn list widerstrebe / wie
wol es also sein muß / das an Christu tzu einem er-
gernisz vnd tzeiche gesetzt / de widersproche werde
muß / vil sich stossen / falle / vn auffer stehen müssen
Darüb hab ich antzuhebē vnser kundtschaft vnd
freuntschaft / dis tractatel vnd Sermon euch wol-
len tzuschreibē im deutzschē / welchs ich latinisch
dem babst hab tzuschreibē / damit fur yderman
meiner lere vnd schreibē von dem babstüb / nit ein
vorweisslich / als ich hof / vsach angetzeigt. Befil
mich hve mit euch / vnd allesampt gotlichen genas-
den. Amen. Zu Wittenberg / An. M. D. XX.

Trar forms ist
sermoe Romas
g/raphus Pape
dilectus p

Ihesus.

Zum ersten / Das wir gruntlich mugē erkennen was ein Christen mēsch sey / vnd wie es gethan sey vmb die freyheit / dye ym Christus erworben vnd geben hat / dauon sant Paulus vil schreybt / wil ich setzenn disze tzwen beschlus.

Eyn Christen mensch ist eyn freyer herr vber alle ding / vnd nymandt vntterthan.

Eyn Christen mensch ist ein dienstpar knecht aller ding / vnd yderman vntterthan.

Disze tzwen beschlus sein klerlich sant Paulus 1. Cor. xij. Ich bin frey in allē dingē / vñ hab mich eins ydermā knecht gemacht. Itē Ro. xij. Ir solt nymandt etwas vorpflichtet sein / den das ir euch vnttereinander liebet. Lieb aber die ist dienstpar / vnd vntterthan dē das sie lieb hat. Also auch von Christo Gal. iij. Got hat seinen son aufgesandt vō einē weib geborē / vñ dē gesetz vnd thā gemacht

¶ Zum andern / Disze tzwo widerstendige rede der freyheit vñ dienstparkeit tzunornemen / sollen wir gedēckē / dz ein yglich Christē mēsch ist tzwey erley natur / geistlicher vnd leyplicher. Nach der se len wirt er ein geistlich / new / ynnerlich mensch genemet: nach dem fleisch vnd blut wirt er ein leyplich / alt vñ eusserlich mēsch genēnet. Vnd vmb disses vnterscheides willē / werdē vō ym gesagt in der schrifft / die do strack's wideresinander sein / wie ich ytz gesagt von der freyheit vnd dienstparkeit.

¶ Zum drittē / so nemē wir fur vns den ynwendigē geistlichē mēschen / tzusehē was dartzu gehore das ein frum / frey Christē mēsch sey vnd heysse. So ist offenbar / dz kein eusserlich dig mag in frey

*Christen mensch sind
zwey erley natur.*

noch frum machen / wie es mag ymmer genennet
werde. Dan sein frumigkeit vñ freyheit / widerumb
sein boßheit vñ gesencknis / sein nicht leiplich noch
eusszerlich. Was hilffts die selē / das der leyb vnge-
fangē / frisch / vnd gesundt ist / ysszet / trinckt / lebt
wie er wil? Widerumb was schadt das der selen /
das der leip gefangen / krank vnd madt ist / hun-
gert / durstet vnd leydet / wie er nicht gerne wolt?
Dieser ding reichet keynes bis an die selen / sie tzu
befreyhen od fahen / frum oder boße tzu machen.
¶ Zum vierden / Also hilffet es die sele nichts /
ob der leyb heilige kleyder anlegt / wie die priester
vnd geistlichen thun / auch nit ob er in den kirchen
vnd heiligen stetten sey. Auch nicht ob er mit heilē
gen dingen vmbgehet. Auch nicht ob er leyplich
bette / faste / walle / vnd alle gute werck thue / die
durch vnd in dem leybe geschehen mochten ewigk
lich. Es muß noch alles etwas anders sein / das
der selen bringe / vnd gebe frumigkeit vnd frey-
heit. Dan alle disse obgenante stuck / werck / vnd
weyssen / mag auch an sich haben vnd vben eyn
boßer mensch / eyn gleyßner vnd heuchler. Auch
durch solch weszen keyn ander volck / dann eyttel
gleyßner werden. Widerumb schadet es der selen
nichts / ob der leyb vnheilige kleyder tregt / an vn-
heiligen orten ist / yft / trinckt / wallet / bettet nicht /
vnd lesszet alle die werck onstehen / die / die ob ge-
nanten gleyßner thun.

¶ Zum funfften. Dat die sele kein ander ding
wyder in hymel noch auf erden / darinnē sie lebe /
frum / frey / vñ Christen sey / dan das heilig Euā-
gelium / das wort gottes von Christo geprediget.
Wie er selb saget Johan. xi. Ich bin das lebenn /
vnd aufferstehung / wer do glaubt in mich / der le-

Johann xi

bet ewigklich. Item .xvij. Ich bin der weg / die
warheyt / vnd das leben. Item Math. iij. Der
mensch lebet nit allein von dem brot / sonder vom
allen wortten die do gehen von dem munde got-
tes. So muessen wir nun gewisz sein / das die sele
kan alles dings entperen / on des wort gottes / vñ
on das wort gottes / ist yhr mit keynem ding be-
holffenn. Wo sie aber das wort hat / szo darff sie
auch keines andern dings mehr / sonder sie hat in
dem wort gnuge / speysz / freud / frid / licht / kunst /
gerechtigeyt / warheyt / weiszheyt / freyheyt / vnd
alles gut vberschwenglich. Also lesenn wir yn
Psalter / sonderlich im .cxvij. psalm / das der pro-
phet nit mer schreyet / dan nach dem gottes wort:
Vnd in der schrift die allerhochste plag / vnd
gottes tzorn gehalten wirt / so er sein wort von den
menschen nympt. Widerumb kein grosser gnade
wo er seyn wort hyn sendet: wie psalmo. ciiij. steet.
Er hat sein wort außgesant / damit er yn hat ge-
holffen. Vnd Christus vmb keins andern ampts
geholfen / den tzu predigen das wort gottes kun-
men ist. Auch alle Apostel / bischoff / priester / vnd
gantzer geystlicher standt / allein vmb des worts
willen ist beruffenn / vnd eyngesetzt: wie wol es
nun leyder anders gehet.

¶ Zum sechste. Fragestu aber / welches ist dan
das wort / das solch grosse gnadt gibt? Vnd wie
solichs gebrauchen? Antwort. Es ist nit anders /
dann die predigt von Christo geschehen / wie das
Euangelium ynnehelt: Welche sol sein / vnd ist
also gethan / das du horest deinen got tzu dir re-
den / wie alle dein leben vnd werck nichts sein vor
got / sonder muesszest mit allendem das in dir ist
ewiglich vorterven. Welches so du recht glaubst /

A iij

loh: xvii

die sel kan alles
entperen on gottes
wort.

die aller hochste plag
is zu sein wort
den menschen nympt.

*Christi in jermis kumel
selig werden für Gott.*

wie du schuldig bist / so mustu ann dir selber vor/
tzweiffeln / vñ bekēnē das war sey der spruch Dsee
D Israel in dir ist nichts dan dein vorterbē / allein
aber in mir stehet dein hulf. Das du aber aus dir
vnd vō dir / das ist aus deinem vorterbē kūmē mu/
gest / so setzt er dir für seinē liebē son Jesum Chri/
stū / vnd lēset dir durch sein lebendigs trostlichs
wort sagē / du solt in den selbigē mit festem glaubē
dich ergebē / vñ frisch in yn vortrawē. So sollē dir
vmb desselben glaubēs willen alle deine sund vor/
geben / alle dein vorterbē vberwundē sein / vnd du
gerecht / warhaftig / befridet / frum / vnd alle ges/
pot erfüllet sein / vō allen dingē frey sein. Wie sant
Paul⁹ sagt Ro. i. Ein rechtfertiger Chriſtē lebt
nur von seinem glaubē. Vñ Ro. x. Chriſt⁹ ist das
ende vnd fulle aller gebot / denen dy in yn glauben.
¶ Zum sibēden / Darumb solt das billich aller
Chriſten eynigs werck vnd vbūg sein / das sie das
wort vnd Chriſtum wol in sich bildeten / solchen
glauben stetig vbeten vnd sterckten. dan kein an/
der werck mag einen Chriſten machē: Wie Chri/
stus Joan. vi. zu den Juden sagt / da sie yn frag/
ten / was sie für werck thun solten / das sie gotlich
vnd Chriſtlich werck theten. Sprach er. Das ist
das eynige gotlich werck das yr glaubt in denen
den got gesandt hat / welchen got der vatter allein
auch dartzu vorordnet hat. Darumb iſts gar ein
vberschwēcklich reichthumb / ein rechter glaub in
Chriſto / den er mit sich bringt alle seligkeit / vnd
abnympt alle vnſeligkeit. Wie Mar. vlti. Wer do
glaubt / vñ tauft ist / der wirt selig. Wer nit glaubt
der wirt vordampft. Darumb der prophet Isa. x.
den reichthumb des selben glaubens ansach / vnd
sprach / Got wirt ein Kurtz summa machen auff er

*Der glaub ist ein
überfließendes reichthumb*

den/vnnd die Kurtz summa wirt wie eyn syndfluß
eynfloessen dy gerechtigkeit. das ist, der glaub
darin Kurtzlich aller gepot erfüllung stehet / wirt
vberflüssig rechtfertigen alle die yn haben / das
sie nichts mer bedürffen / das de gerecht vn frum
sein. Also sagt sant Pauls Ro. x. Das man vn
hertzen glaubt / das macht einen gerecht vn frum.
¶ Zum achtenn / Wie gehet es aber zu das der
glaub allein mag frum machen / vnd on alle werck
so vberschwäcklich reichtüb geben / so doch souil
gesetz / gebot / werck / stend / vnd weysze vns furge
schriben sein in der schrift? Die ist fleissig tzu merck
cken / vnd yhe mit ernst tzu behaltē / das allein der
glaub on alle werck frum / frey / vnd selig machet /
wie wir hernach mer horen werde. Vñ ist czu wis
sen das die gantz heilige schrift wirt in tzu weyers
ley wort geteilet / welche sein / gebot oder gesetz got
tes / vnd voherschen oder tzu sagunge. Die gepot
lernen vn schreybē vns fur mancherley gutte werck /
aber damit sein si noch nicht geschē. Sie weysē
wol / sie helfen aber nicht / lernen was man thun
sol / geben aber kein sterck dartzu. Darumb seyn
si nuhr dartzu geordenet / das der mensch daryn
nen sehe sein vnuormugen czu dem gutten / vn lerne
an ym selbs vortzweyffeln. Vnd darüb heissen sie
auch das alte testamēt / vnd gehoren alle vns alte
testament. Als das gepot / Du solt nit boß begird
haben / beweyset das wir allesampt sunder sein /
vn kein mēsch vormagt zu sein on boße begirde / er
thu was er wol: daraus er lernet an ym selbs vor
tzen / vn anderswo tzu suchen hulff / das er on
boße begirde sey / vn also das gepot erfülle / durch
eynenandern / das er auß ym selb nicht vormag. al
so sein auch alle andere gebot vns vnmuglich.

*Enosho quō fieri
sola fide iustificatur*

Scripturae positio

N.

*in pharisaeis legis nobis
impossibilis.*

mit dem geboten leuor
man sein linder sagen

Christi
selig

Christus in Christus
lofta in phony ruit hagen

In 7
über

A Zum neunden / Wen nun der mensch auß
den gebotten sein vnuornugen gelernet / vnd ent-
pfunden hat / das ym nun angst wirt / wie er dem
gebot gnug thue: Seyte einmal das gebot muß er-
fullet sein / oder er muß vordampt sein: So ist er
recht gedemutigt / vnd tzu nicht worden / in seinen
augen / findet nichts in yhm / damit er mag frum
werden. Dan so kumpt das ander wort / die got-
lich vorheischung vñ tzusagung / vnd spricht / wilt
du alle gepot erfüllen deiner bösen begirde / vñnd
sundt losz werden / wie die gepot tzuwingē vnd for-
dern / Siheda / glaub in Christum / in welchem
ich dir tzusag / alle gnadt / gerechtigkeit / fryd / vnd
freyheyte: glaubstu / so hastu / glaubstu nit / so hast
du nicht. Dann das dir vnmöglich ist mit allen
wercken der gepot / der vil vnd doch keyn nutz sein
mußzen / das wirt dir leicht vnd kurtz / durch den
glaubē. Dan ich hab kurtzlich in den glaubē gestel-
let alle ding / das / wer yn hat / sol alle ding haben /
vnd selig sein: wer yn nit hat / sol nichts haben. Al-
so geben die tzusagung gottes / was die gebot er-
fordern / vnd vorbringen / was die gebot heysen /
auff das es alles gottes eygen sey. Gebot vnd er-
fullung er heyszet alleyn / er erfüllet auch alleyn.
Darumb sein die tzusagung gottes / wort des ne-
wen testaments / vñnd gehoren auch yns newe
testament.

A Zum tzehenden / Nun sein disse vñnd alle
gottes wort / heilig / warhafftig / gerecht / fridsam
frey / vñnd aller gute vol: darumb wer yn mit einē
rechten glauben anhangt / des sele wirt mit yhm
voreinigt so gantz vñnd gar / das alle tugent des
worts auch eygen werden der selen. Vñnd also
durch den glauben die sele von dem gottes wort /

hellig/gerecht/warhafftig/fridsam/frey/vn aller
gute vol/ein warhafftig kind gotes wirt/wie Jos
han.i.sagt. Er hat yn geben/das sie mugē kinder
gottes werden alle die in seinen namen glauben.
Dierauf leichtlich tzu merckē ist/warüb 3 glaub
so vil vormag/vnd das keine gute werck im gleych
sein mugē. Dan kein gut werck häget an dem got/
lichen wort/wie der glau/eban auch nit in der selē
sein/sund allein das wort vnd glau be regirē in der
selen. Wie das wort ist / so wirt auch die sele von
im : gleich als das eyszen wirt glutrodt wie das
feuer aus der voreinigung mit dem feuer. Also se
hen wir/das an dem glau bē ein Christen mensch
gnug hat / darff keines wercks das er frum sey:
darff er dan keines wercks mehr/so ist er gewisz/
lich entpunden vō allen gepottē vnd gesetzen: ist er
entpunden / so ist er gewiszlich frey. Das ist die
Christlich freyheit/der eynige glau b/der do ma/
cht/mit das wir muessig gehē/oder vbel than mu/
gen/sonder das wir keines wercks bedurffen tzu
der frumigkeit vnd seligkeit tzu erlangen. dauon
wir mer hernach sagen wol en.

¶ Zum eylffte/ Weiter ist mit dem glau bē also
gethan/das/welcher dē andern glau bt / d glau bt
ym darüb/das er yn fur einen frumen/warhafftis
gē mā achtet/welchs dy groste ere ist/dy ein mēsch
dem andern thū kan. als widerüb die groste sch/
mach ist/so er in fur ein losen/Augehafftigē/leicht/
fertigē man achtet. Also auch wen die sele gottes
wort festiglich glau bt/so helt sie yn fur warhafft
tig/frū vn gerecht/damit sie ym thut dy allergros/
siste ere/die sie ym thū kan. dā do gib t sie im recht
da leisset sie ym recht/da eret sie seine namen/vn leisset
mit yr hādeln wie er wil/dā sie t zweiffelt nit er

B

*Das wort und glau b
regirē in der sele*

alle
sam
ein
hm
des
also
ort/

Wot by man byn gref
für vnsch außspruch byn
für mich phat byn.

Chri
selig

sey frum/warhafftig in allen seinen worten. **W**iderumb kan man got kein grossere vnere auffthun dan im nit glaubē/damit die sel yn für einen vntu/chtigen/lugēhafftigen/leichtfertigen helt/vnd so vil an yr ist/yn vorleugnet mit solchem vnglaubē/vnd ein abgot yres eygens sin im hertze wider got aufricht/als wolt sie es besser wissen dan er. **W**en dan got sihet das im die seel warheit gibt/vñ also eret durch yren glauben/so eret er sie widerumb/vnd helt sie auch für frum vnd warhafftig/vñd sie ist auch frum vñd warhafftig durch solchem glauben: dan das man got die warheit vñ frümig keyt gebe/das ist recht vñd warheit/vnd macht recht vñd warhafftig. Die weil es war ist vñd recht das got die warheit geben werd/welchs die nit thun die nit glaubē/vnd doch sich mit vilen guten wercken treibē vnd muhen.

Zum .xij. Nit allein gibt der glaub souil dz die seel dem gotlichen wort gleich wirt aller gnas/den vol/frey/vnd selig/sonder voreinigt auch die seel mit Christo/als eine braut mit yrem breutgā. **A**uf welcher ehe folget/wie sant Paul sagt/das Christus vnd die seel ein leib werden/so werden auch beyder gutter fal/vnfal/vñd alle ding gemein/das was Christus hat/das ist eygen der glaubigē seel/was die seel hat wirt eigen Christi. **S**o hat Christus alle gutter vnd seligkeit die sein der seelen eigen/so hat die seel alle vntugēt vñ sundt auff yr/dy werdē Christi eigen. **D**ie hebt sich nun der frolich wechsel vñ streit/die weil Christus ist got vnd mēsch/welcher noch nie gesündigt hat/vñ sein frümigkeit vnberwintlich/ewig vñ almechtig ist. **S**o er den der glaubigē seel sund durch yren brautring/das ist der glaub/im selbsts eigē macht/

Der p
phat

NB

vnd nit anders thut dan als het er sie gethan / so
mussen die sund in ym vorschlundē vñ erseuft wer-
den. Dan sein vnuberwindlich gerechtigkeit ist al-
len sunden tzu starck. also wirt die seel von allen
yren sunden lautterlich durch yren malschatz / das
ist des glaubē halbē ledig vnd frey / vnd begabt
mit der ewigē gerechtigkeit yrs breutgams Chri-
sti. Ist nun das nit ein froliche wirtschaft da der
reiche / edle / frum breutgam Christus das arme
vorachte bofes hurlein tzu der ehe nimpt / vnd sie
entledigt vō allem vbel / tziret mit allen gutern. So
ists nit muglich das die sund sie vordāme / dan sie
ligen nun auff Christo / vñ sein in ym vorschlundē
de: so hat sie so ein reiche gerechtigkeit in irē breut-
gam / dz sie aber mals wider alle sund bestā mag /
ob sie schon auff yr ligen. Danon sagt Paulus. i.
Cor. xv. Got sey lob vñ danck der vns hat gegeben
ein solch vberwidūg in Christo Jesu / in welcher
vorschlundē ist der todt mit der sundt.

¶ Zum. xiiij. Die sichstu aber auf welchem grūd
dem glaubē souil billich tzugeschriben wirt / das
er alle gepot erfüllet / vnd ou alle andere werck frū-
macht. Dan du sihest hie das er das erste gepot er-
fult allein / da gepoten wirt / Du solt einen got erē.
Wen du nun eytel gutewerck werest bis auff dy ver-
sen / so werestu dennoch nit frum vnd gebest got
noch kein ere / vnd also erfüllestu das aller erst ge-
pot nit. Dā got mag nit geeret werden / ym werdt
dan warheyt vnd alles gut tzugeschribē / wie er dā
warlich ist. Das thun aber kein gute werck / sond
allein der glaub des hertzen : darumb ist er allein
die gerechtigkeit des menschen vnd aller gepot er-
füllig. Dā wer dz erst haubt gepot erfult / der er-
fult gewisslich vñ leichtlich auch al ander gepot. dy

B ij

*Der gläubigen sünden
Lügen nicht Erlöso.*

*Der gläubigen für
alle gebott*

Wirdt man soll man
Herrn Gott zu ehren /

Der Herr Jesus / der
selbst ist der glaub /

Chri
soli

Jesus Christus

Die erste geburt etc.

In p
über p

were aber sein todte ding / kunden nit eren noch
loben got / wiewol sie mugen geschehen / vnd last
sich thun got tzu eren vnd lob : aber wir su he
bye den / der nit gethan wirt / als die werck / sond
den selbthetter vnd werckmeister / der got eret / vn
die werck thut. Das ist nymandt dann der glaub
des hertzen / der ist das habt / vnd gantzes wes
sens der frumigkeit. Darumb es eynerlich finster
rede ist / wenn man lernet die gottes gebot mit
wercken tzu erfüllen / so die erfüllung vor allenn
wercken durch den glauben musz geschehen sein /
vnd die werck volgen nach der erfüllung / wie wir
horen werden.

¶ Zum vierzeheden / Weiter tzu sehen was
wir in Christo haben / vnd wie gros gut sey eynn
rechter glaube / Ist tzu wissen das vor vnd in dem
alten testament got im aufzog / vnd furbehilt alle
erste menliche geburt / von menschen vnd von thy
ren. Vnd die erst geburt war kostlich / vnd hat
tzuwen grosse vorteyl vor alle andern kindern / nem
lich die herschafft vnd priesterschafft / oder konig
reich vn priesterthub / also das aufferden das erst
geborn kneblein was ein herr yber alle seine br
der / vnd ein pfaff oder Babst vor got. Durch
welche figur bedeut ist Jesus Christus / der ey
gentlich die selb erste nemlich geburt ist gottes va
ters / von der iunckfrawen Maria. Darumb ist er
ein konig vn priester / doch geistlich : dan sein reich
ist nit yrdenisch / sonder in geistlichen guttern / als
da sein warheit / weisshet / frid / freudt / seligkeit /
ze. Damit aber nit aufgezogen ist zeitlich gut /
dan es ist ym alle ding vnterworffen / in hymel /
erden / vnd helle / wiewol man yn nicht sieht / das
macht das ehr geystlich / vn sichtbar regirt. Al

so auch sein priesterthumb stehet nit in den eusser-
lichen geyden / vnd kleydern / wie wir bey den
menschen sehenn / sonder es stehet ym geyst vnd
sichtlich / also / das er vor gottes augen on vntter-
laß / fur die seinen stehet / vnd sich selb opffert /
vnd alles thut / was eyn frum priester thun sol.
Er bittet fur vns / Wie sandt Paul. Ro. viij. sagt.
So leret er vns inwēdig im hertzen / welches sein
tzwey eygentliche recht ampt eynes priesters. Dā
also bitten vnd leren auch eusserlich menschlich
tzeitlich priester.

¶ Zum funfftzehendem. wie nun Christus
die erste geburt hat / mit yrer ere vnd würdigkeyt /
also teylet er sie mit allen seinen Christen / das sie
durch den glauben müssen auch alle kunige vnd
priester sein mit Christo / Wie sant Petrus sagt. i.
Pet. ij. Ir seyt eyn priesterlich kunigreich / vnd eyn
kuniglich priesterthumb. Vnd das gehet also
tzu / das eyn Christenn mensch durch den glaub
ben so hoch erhaben wirt vber alle ding / das er al-
ler eynherr wirt geystlich. Dann es kan ym keyn
ding nicht schaden tzu der seligkeit. Ja es muß im
alles vntterthan sein / vnd helffen tzu der seligkeit.
Wie sant Paulus leret Ro. viij. Alle dingt mues-
sen helffen den außzerwelten tzu yrem besten / es
sey leben / sterben / sundt / frummigkeyt / gut vnd
bofes / wie man es nennen kann. Item. i. Cor. iij.
Alle ding sein ewer / es sey das leben oder der tod
gegenwertig oder tzukunftig ꝛc. Nicht das wir
aller ding leyplich mechtig sein / sie tzu besitzen /
oder tzubrauchen / wie die menschen auff erden.
Dan wir muessen sterbenn leyplich / vnd magt ny-
mandt dem todt entfliehen / so muessenn wir auch
vil andern dingen vntterligen / wie wir in Christo

B iij

Einsig bittet für uns.

vnd seinen heyligen sehen. Dan disz ist ein geyst/
lich herschafft / die do regirt in der leiplichen vnt/
terdruckung: das ist / ich kan mich an allenn din/
gen bessern nach der seelen / das auch der todt vnd
leyden muessen mir dienen / vnd nutzlich seyn
tzu der seligkeit. das ist gar eyn hohe erliche wir/
digkeit / vnd ein recht almechtige herschafft / eyn
geistlich kunigreich / da kein ding ist szo gut / szo
bosse / es muß mir dienen tzu gut / so ich glaube / vñ
darf sein doch nit / sond mein glaub ist mir gnug
sam. Syhe wie ist das ein kostlich freyheit vnd ge
walt der Christen.

Azum sechzehendē / Ober das sein wir priester
das ist noch vil mer dan kunig sein / darumb das /
das priesterthüb vns würdig macht vor got tzutres
ten / vnd fur andere tzu bitten. Dan vor gottes au/
gen tzu stehen vnd bitten / gepurt nymädt dan den
priestern. Also hat vns Christus erworben / das
wir mugen geistlich fur ein ander treten vnd bit
ten / wie ein priester fur das volck leyplich trit vnd
bittet. Wer aber nit glaubt in Christū / dem die/
net kein ding tzu gut / ist ein knecht aller ding / muß
sich aller ding ergern: dartzu ist sein gepet nit ange
nem / kumpt auch nit fur gottes augen. Wer mag
nun aufdencken die ere vnd hohe eynes Christen
menschen: durch sein kunigreich ist er aller ding
mechtig / durch sein priesterthüb ist er gottes mecht/
tig / dan got thut was er bittet: vnd wil / wie do
stehet geschriben im Psalter. Got thut den willē
der die yn furchten / vnd erhoret yr gebet. tzu wels
chem eren er nur allein durch den glaubenn / vnd
durch keyn werck kumpt. Daraus man clar sibet /
wie ein Christen mensch frey ist von allen dingen

vnd vber alle ding/also das er keiner gutter werck
dartzu bedarff/das er frum vnd seligk sey/sonder
der glaub bringts ym alles vberflüssig. Vnd wo
er so toricht were/vñ meynet durch eyn gut werck
frum/frey/selig oder Christen werden/so vorlur
er den glauben mit allen dingen:gleich als d. hūdē
der eyn stuck fleisch im mund trug/vnd nach dem
schemen im wasser schnapt/damit fleisch vnd
schem verloren.

Zum sibentzehenden fragestu/Was ist
dann fur eynn vntterscheydt tzwischen den pries
tern vnd leyen in der Christenheyt/so sie alle pries
ter sein? Antwort. Es ist dem wortlein priester/
pfaff/geistlich/vnd des gleichen vnrecht geschē
das sie von dem gemein hauffen sein getzogē auff
den kleinen hauffen/den man ytzt nennet geystli
chen standt. Die heilige schrift gibt keinē andern
vnterscheydt/dan das sie die gelerten oder gewey
heten/nennet ministros/seruos/oeconomos. das
ist/diener/knecht/schaffner/die do sollen den an
dern Christū/glauben/vnd Christliche freyheyt
predigen. Dan ob wir wol alle gleich priester sein/
so kunden wir doch nit alle dienen oder schaffenn
vnd predigen. Also sagt sant Pauls.i. Corint. iij.
Wir wollen nichts mer von den leutten gehalten
sein/dan Christus diener vnd schaffner des Euā
gelij. Aber nun ist aus der schaffnerey worden ein
solch weltlich/eusserlich/prechtige/forchtsam her
schafft/vñ gewalt/das yr die recht weltlich mache
in keynen wegk mag gleichen/geradt als werē die
leyen etwas anders dann Christenleudt/damit
hyn genummen ist der gantz vorstandt Christlich
er genad/freyheit/glaubens/vnd alles was wir

von Christo haben / vnd Christus selbs haben
dafür vberkūmen vil menschen gesetz vnd werck
sein gantz knecht worden / der alleruntuchtigsten
lewte auff erden.

Azum achtzehenden / Auf dem allen lernen
wir / das es nicht gnug sey gepredigt / wen man
Christus leben vnd werck obenhyn / vnd nur als
eyn hystoria vnd Cronicken geschicht predigt /
schweyg dan / so man sey in gar schweygt / vnd
das geystlich recht oder ander menschen gesetz
vnd lere predigt. Er ist auch vil / die Christum
also predigen / vnd lesen / das sie eyn mitleiden
vber ynn habenn / mit den Juden tzu nenn / oder
sonst mehr kyndisch weysz darinnen vben. Aber
er sol vnd muss also predigt seyn / das mir vnd
dir der glaub daraus erwachs / vnd erhalten
werdt. Welcher glaub dardurch erwechst / vnd
erhalten wirdt / wen mir gesagt wirdt / warumb
Christus kummen sey / wie man sein brauchen
vnd messzen sol / was er mir bracht vnd geben
hath. das geschicht wo man recht auslegt dye
Christlich freyheit / die wir von ym haben / vnd
wie wir kunig vnd priester sein / aller ding mecht
tig / vnd alles was wir thun / das vor gottes au
gen angenehm vnd erhoret sey / wie ich bißher ge
sagt hab. Dan wo eyn hertz also Christum hos
ret / das muss frolich werden vnn gantzen
grundt / trost entpfahen / vnd suez werden gegē
Christo / yn widerumb lieb tzu haben. Dahyn es
nymmer mer mit gesetzenn oder werckē kummen
mag. Dan wer wil einem solchen hertzen schadē
thun / oder erschrecken? felt die sundt vnd der todt
doher / so glaubt es Christus frūmigkeit sey sein
vnd sein sund sein nymmer sein / sonder Christi /

so muß die sundt vorschwinden / für Christus frö-
migkeyt in dem glauben / wie daroben gesagt ist /
vnd lernet mit dem Apostel dem todt vnd sundt
trotz bieten / vnd sagen: wo ist nun du todt dein
sig: wo ist nun todt dein spieß? dein spieß ist die
sundt. Aber got sey lob vnd danck / der vns hat ge-
ben den sieg / durch Jesum Christum vnsern hern.
Vnd der todt ist erseufft in seinem sig zc.

Ezum neuntzehenden / Das sey nun gnug ge-
sagt von dem ymnerlichen mēschen / von seiner frei-
heit / vnd der heubt gerechtigkeit / welch keines ge-
setzs noch guten wercks bedarff / iha yr schedlich
ist / so ymandt dardurch wolt rechtfertig tzu wer-
den sich vormessen. Nun kumen wir auff's ander
teyl / auff den eusserlichen menschen. Hye wollen
wir antworten allen denen / die sich ergern auß dē
vorigen reden / vnd pflegen tzusprechen / Ey so dan-
der glaub alle dingē ist / vnd gilt allein gnugsam
frum tzu machen / wurumb sein dann die gutten
werck gepotten? so wollen wir gutter ding sein / vñ
nichts thun. Neyn lieber mensch / nicht also. Es
wer wol also / wen du allein ein ymnerlich mensch
werest / vnd gantz geystlich vnd ymnerlich worden /
welchs nit geschicht bis am iungstenn tag. Es ist
vnd bleibt auff erden nur ein anheben / vnd tzune-
men / welchs wirt in ihener welt vorbracht. Das
her heisset der Apostel primitias spiritus / das sein
die ersten frucht des geistes: darüb gehort hyeher
das daroben gesagt ist / Ein Christen mensch ist
ein dienstbar knecht / vnd yderman vnttherthan /
gleich / wo er frey ist / darff er nichts thun / wo er
knecht ist / muß er allerley thun. Wie das tzugehe
wollen wir sehen.

E

Zum tzwentzigsten / Ob wol der mēsch yn-
wendig nach der selen durch den glaubē gnugsam
rechtsfertig ist / vnd alles hat was er haben sol / on
das der selb glaub vnd gnugde muß ymmer tzune-
men bis in yhenes leben / so bleibt er doch noch
in difem leyplichen leben auff erden / vnd muß sei-
nen eigen leyprerir / vnd mit leuthen vmbgehen .
Da heben sich nun die werck an / hye muß er nicht
muffig gehen / da muß furwar der leyb mit fastē /
wachen / arbeyten / vnd mit aller messiger tzu-
getriben vnd geubt sein / das er dem ynnerlichen
menschen / vnd dem glauben gehorsam vñ gleich-
formig werde / nit hyndere noch widerstreb / wie
sein art ist / wo er nit getzwungen wirt . dan der yn-
nerliche mensch ist mit got eynes / frolich / vnd lu-
stig / vmb Christus willen / der ym souil than hat
vnd stett alle sein lust darin / dzer widerüb mocht
got auch vmbsonst dienen in freyer lieb / szo findt
er in seinem fleisch eyne widerspenstigen willen /
der wil der welt dienen / vnd suchen was yn lustet .
Das mag der glaub nit leiden / vnd legt sich mit
lust an seinen halb yn tzu dempffen vnd weren .
Wie sandt Pauls sagt Ro. vii. Ich hab ein lust
in gotes willen nach meinem innern menschen / so
find ich einen andern willen in meinem fleisch / der
wil mich mit sunden gefangen nemen . Item ich
tzuchtige meinen leyb / vnd treyb yn tzu gehorsam
auff das ich nit selbs vorwerflich werde / der die
andern leren sol . Item Gal. v. Alle die Christū
angehoren / creutzigen yr fleisch mit seinen boszen
lusten .

Zū. xxi. Aber die selben werck müssen nit
geschehen in der meynung / das dardurch d mēsch

frum werdt vor got: dan die falsch meynung kan
der glaub nit leyden / der alleyn ist / vnd sein muß
die frümigkeit vor got / sonder nur in der meinung
das der leyb gehorsam werde / vnd gereynigt von
seinen bösen lusten / vnd das aug nuhr sehe auff
die bösen lusten sie auß tzutreyben. Dan die weyl
die seel durch den glauben reyn ist / vnd got liebet /
wolt sie gern das auch also alle ding reyn weren /
tzuo: yr eygen leib / vnd yderman got mit yr liebe
vnd lobt. So geschichts das der mensch seins ey-
gen leybs halben nit kan mussig gehen / vnd muß
vil gutter werck darober vben / das er yn tzing /
vnd doch die werck nicht das rechte gut sein / da-
von er frum vnd gerecht sey vor got / sonder thue
sie auß freyer lieb vmbsonst / got tzugefallē / nichts
daryn anders gesucht noch angesehen / dann das
es got also gefellet / welchs willen er gerne thet
auffs allerbeste. Daraus dann eyn yglicher kan
selbs nemen die maß vnd bescheydenheyt den leib
tzucasteyen / dan er fastet / wachet / arbeyt / souil er
sicht dem leyb nodt seyn / seinen mutwillenn tzu
dempffen. Die andern aber die do meynen mit
wercken frum tzu werdenn / haben feyn acht auff
die casteyung / sunder sehen nur auff die werck / vñ
meynen wen sie der selben nur vil vnd gros thun /
so sey es wol than / vnd sie frum worden: tzu weyl-
len tzubrechen die kopff / vnd vorterbē yr leyb dar-
uber / das ist ein grosse torheyt / vnd vnuorstandt.
Christlichs lebens vnd glaubens / das sie on glau-
ben durch werck frum vnd selig werden wollen.

¶ Tzu tzuwei vñ tzwentzigstē / Das wir des etlich
gleichniß geben / sol man die werck eines Christen

L ij

Adam war von Gott
frum und wolgeschaffen
vor sünd.

menschen der durch seinen glauben / vnd auß laute-
ren gnaden gottes / vmb sunst ist rechtfertig / vnd
selig worden / nit anders achten / dā wie die werck
Adam vnd Eue im paradyß gewesen weren / do
von Gen. ij. stehet geschribē / das got den geschaf-
fen menschen setzt yns paradyß / das er dasselb
arbaitten vnd huten solt. Nun war Adam vō got
frum vnd wolgeschaffen / on sünd / das er durch
sein arbaitten vnd huten nit dorfft frum vnd recht-
fertig werden / doch das er nit muessig ging / gab
ym got tzu schaffen / das paradyß tzu pflantzen /
bawen vnd bewaren. Welchs weren eyttel frey
werck gewesen / vmb keyns dings willen gethan /
dan allein got tzugefallen / vnd nit vmb frūmigs-
keyt tzu erlangē / die er tzuuor het / welch vns auch
allē naturlich were angeborn gewesen. Also auch
eynes glaubigen menschen werck / welcher durch
seinen glauben ist widerüb yns paradyß gesetzt /
vnd von newen geschaffen / darff keyner werck
frum tzu werden / sonder das er nit muessig gehe /
vnd seynen leyb arbeit vnd beware / sein ym solche
freye werck tzu thun allein got tzu gefallē befolhē.
Item gleich wie ein geweihter bischoff / wen der
Kirchen weyheyt / fermelt / oder sunst seines ampts
werck vbet / so machen yn die selben werck nit tzu
eynem bischoff / iha wen er nit tzuuor ein bischoff
geweyhet were / so tuchte der selben werck keynes
vnd were eyttel narn werck. Also ein Christē / der
durch den glaubē geweiht / gute werck thut / wirt
durch die selbē nit besser od mer geweyhet (welch
nit den des glauben merung thut) tzu einem Chri-
sten / iha wen nit tzuuor glaubet / vnd Christenn
were / so gulten alle seine werck nichts / sonder we

ren eyttel nerrisch / streflich / vordanlich sundt.

¶ Zum drey vnd tzwentzigsten / Darumb sein die tzuwen spruch war / Gutte frume werck mache nimmer mer eyn guten frummen man: sonder eyn gut frum man macht gutte frume werck. Bofe werck machen nimmer mer eyn bofen man / sond ein bofer man macht bofe werck: also das alweg die person tzuuor muß gut vnd frum sein vor allen guten wercken / vnd gute werck folgen vnd auß gehen von der frumen guten person. Gleich wie Christus sagt. Ein bofer bawm tregt kein gutte frucht. Eyn gutter bawm tregt kein bofe frucht. Nun ist offenbar / das die frucht tragen nicht den bawm / so wachssen auch die bawm nit auff den fruchten / sunder widerumb / die bawm tragē die frucht / vnd die frucht wachssen auff den bawmē. Wie nun die bawm muessen ehe sein dann die frucht / vñ die frucht machen nit die bawm wider gutte noch bofe / sonder die bawm machenn die fruchte. Also muß der mēsch in der person tzuuor frum oder bofe sein / ehe er gutte oder bofe werck thut. Vnd seine werck machen yn nit gut od bof / sond er macht gute oder bofe werck. Des gleichē sehen wir in allen handtwercken / eyn gut od bof hauf macht keynen gutten oder bofen tzimmer / man / sonder eyn gutter oder bofer tzimmerman macht eyn bof oder gutt hauf: keyn werck macht eynen meyster / darnach das werck ist / sonder wie der meyster ist / darnach ist sein werck auch. Also sein die werck des menschen auch / wie es mit ym stehet im glauben oder vnglauben / darnach seyn seine werck gut oder bofe. Vnd nit widerüb / wie seine werck stehen / darnach sey er frum oder glauß

Verbum Lutheri.

*Arbor simili liti
hominis.*

*Sola fide, gratis
iustificamur*

big die werck gleich wy sie nicht glaubig machen/
so machen sie auch nicht frum. Aber der glaub
gleich wie er frum macht / so macht er auch gute
werck. So dan die werck nymät frum machen / vñ
der mensch tzuuor muß frum sein ehe er wirckt / so
ists offenbar das alleyn der glaub aus lautteren
gnaden / durch Christu vñd sein wort die person
gnugsam frum vñd selig machet. Vñd das keyn
werck / kein gepot einem Christen nodt sey tzu der
seligkeyt / sonder er frey ist von allen gepoten / vñd
auf lautterer freyheytt vmbfunst thut / als was er
thut / nichts damit gesucht seines nutzts oder selig
keit. Dan erschon sat vñ selig ist durch seine glau
bē / vñ gottes gnadē / sond nur got darinnē gefallē.

¶ Zum. xxiij. Widerumb dem der on glau
ben ist / ist keyn gut werck furderlich tzu der frum
migkeyt vñd seligkeyt : widerüb keyn bose werck
yn bose vñd vordäpt machen / sonder der vnglaub
der die person vñd den bawm bos macht der thut
bose vñd vordampfte werck. Darumb wen man
frum oder bose wirt / hebet sichs nit an dē werckē
an / sonder an dem glauben. Wie der weyße man
sagt. Anfang aller sundt ist von got weichen vñd
yn nicht trawenn. Also leret auch Christus / wie
man nicht an den wercken muß anheben / vñ sagt.
Entweder macht den bawm gut / vñ seine frucht
gut / oder macht den bawm bose / vñd sein frucht
bose. als solt er sagen / wer gutte frucht haben wil
muß tzuuor an dem bawm anhebenn / vñd den sel
ben gut setzen. Also wer do wil gutte werck thun /
muß nicht an den wercken anheben / sonder an der
person dye die werck thun sol. Die person aber
macht nymandt gut / dan alleyn der glaub / vñd

*peccatorum oim dignif
sio a' deo et desperatio*

N.

nymandt macht sie bofe/dan allein der vnglaub.
Das ist wol war/die werck machen eyne frum
oder bofe fur den menschen. das ist/sie tzeu ge euf
serlich an/wer frum oder bofe sey. Wie Christus
sagt Math. vii. Auf yren fruchten sollet yr sie erk
ennen. Aber das ist alles im scheyn vnd euf
serlich. Welchs ansehen yre macht vil leuth/die
do schreyben vnd lernen/wie man gutte werck
thun sol/vnd frum werden/so sie doch des glau
bens nimmer gedenccken/gehen dahyn/vnd fu
ret ymmer eyn blindter den andern/martern sich
mit vilen wercken/vnd kummen doch nimmer
tzu der rechten frumigkeit. von welchem sant
Pauls sagt. ij. Timo. iij. Sie haben einen scheyn
der frumigkeit/aber der grundt ist nicht da/
gehen hyn vnd lernen ymmer vnd ymmer/vnd
kummen doch nimmer tzu der erkentnis der wa
ren frumigkeit. Wer nun mit den selbigen blin
den nicht wil yren/muf weytter sehenn/dann in
die werck/gepot/oder lere der werck. Er muf in
die person sehenn vor allem dingen/wie die frum
werd. Die wirt aber nicht durch gepot vn werck/
sonder durch gottes wort (das ist/durch seine vor
heyschung der gnaden) vnd den glauben frum
vnd seligt/auf das bestehe sein gotliche ere/das
er vns nicht durch vnser werck/sonder durch sein
genedigs wort vmb sunst vnd lautter barmher
zigkeit selig mache.

¶ Zum funff vnd tzentzigsten/Aus dys
sem allem ist leichtlich tzuuor stehen/wie gutte
werck tzuuorwerffen vnd nicht tzuuorwerffen
seyen/vnd wie man alle lere vor stehen sol/die do
gutte werck leren. Da wo der falsch anhang/vn die

Math. vii.

Gratia saluandis.

vorherete meynung daryn ist / das durch dy werck
wir frum vnd selig werden wollen / sein sie schon
nit gut / vnd gantz vordamlich / dann sie sein nicht
frey / vnd schmehen die gnad gottes / die alleyn
durch den glaub frum vnd seligk macht / welchs
die werck nit vormugen / vnd nemen es ynn doch
fur tzu thun / vnd damit der gnaden in yr werck vn
ere greiffen. Darub vorwerfen wir die gute werck
nit vmb yre willen / sonder vmb des selben boszen
tzusatzs / vnd falcher vorheretter meynung willen.
welche macht / das sie nur gut scheynen / vnd sein
doch nit gut / betriegen sich vnd yderman damit /
gleich wie die reysende wolff in schaffs kleidern.
Aber der selb bose tzusatz / vnd vorherete meynung /
In den wercken ist vnuberwindlich / wo der glaub
nit ist. Er muß sein in dem selbigen wirckheiligen
bis der glaub kam / vnd vorstore yn / die natur vor
mag yn von yr selb nit austreiben / ia auch nicht
erkennen / sonder sie helt yn fur eyn kostlich / seligk
ding / darumb werden yr auch souil dardurch vor
furet. Derhalbenn obs wol gut ist von rewen /
beichten / gnugthun / schreiben vnd predigen / so
man aber nit weitter feret bis tzum glauben / sein
es gewisslich eyttel teuffelische / vorfurische lere.
Man muß nit eynerley allein predigen / sonder al
le beyde wort gottes. Die gebot sol man predigen
die sunder tzu schrecke / vnd yr sund tzu offenbarn
das sie rewe haben / vnd sich bekeren. Ader do sol
es nit bleiben / man muß das ander wort / die tzu
sagung der gnaden auch predigen / den glauben tzu
lernen / on welchen dy gepot / rew / vnd alles ander
vorgebens geschicht. Es sein wol noch blibe pres
diger / die rew der sundt vnd gnadt predigen / aber

8
21
Din gebot v. 14. 16
soll man frumigen
die sündas zu schrecke
vnd in die sünd offen
barn /

ſie ſtreichen die gepot vnd tzuſagung gottes nicht
auf / das man lere / woher / vnd wie die rew vnn
gnad kume. Dan die rew fleuſt aus den gepottē /
der glaub auß den tzuſagung gottes / vnd alſo
wirt der menſch durch den glaubē gotlicher wort
gerechtfertiget vnd erhaben / der durch die forcht
gottes gepottes gedemutiget / vnd in ſein erkent
nuß kummen iſt.

¶ **Zum. xxvi.** Das ſey von den wercken ge
ſagt in gemeyn / vnd die eyn Chriſten menſch ge
gen ſeinem eygen leybe vben ſol. Nun wollen wir
von mer wercken ſagen / die er gegen andere men
ſchen thut. Dan der menſch lebt nit allein in ſey
nem leybe / ſonder auch vntter andern mēſchē auff
erden. Darüb kan er nit on werck ſein gegē die ſel
ben / er muß yhe mit yn tzu reden vnd tzuſchaffen
haben / wie wol ym der ſelbigen werck keins nodt
iſt tzu der frümigkeiſt vnd ſeligkeyt. Darumb ſol
ſeine meynung in allen wercken frey / vnd nur das
hyn gericht ſein / das er andern leuttē damit diene
vnd nutz ſey. Nichts anders ym furbilde / dann
was den andern nodt iſt. das heyyſſet den ein war
haſtig Chriſten leben / vnd da gehet der glaub
mit luſt vnd lieb yns werck / als ſant Paulus leret
die Galatas. Dann tzu den Philippen / do er ſie
geleret hette / wie ſie alle gnad vnd gnugde hetten
durch yren glauben in Chriſto / leret er ſie weiter
vnd ſagt / Ich vorman euch alles troſts / den yr yn
Chriſto habt / vnd alles troſts / den yr habt vō vn
ſer liebe tzu euch / vnd aller gemeinſchafft / die yhr
habt mit allen geiſtlichen frummen Chriſten / yr
wolt mein hertz erfrewen volkomlich / vnd das da
mit / das yr hynfurt wollet eines ſinnes ſein / einer

D

*Man kumpt auß den
geboten der glaub an
den tzuſagungen gottes*

gegen dem andern lieb ertzeigē / einer dem andern
dienen / vnd ein yglicher acht haben / nit auff sich
noch auff das seine / sonder auff den andern / vnd
was dem selbē nodt sey. Syhe da hat Paul⁹ kler-
lich eyn Christenlich leben dahyn gestellet / das al-
le werck sollē gericht sein dem nechstē tzu gut. Die
weil ein iglicher fur sich sebs gnug hat an seynem
glauben / vnd alle andere werck vñ leben ym vbrig
sein / seinen nechstē damit auff freyer lieb tzu dienē.
Dartzu furet er ein Christū tzu einem exēpel / vnd
sagt: Seyt also gesinnet wie yr sehet in Christo.
Welcher ob er wol vol gotlicher form ware / vnd
fur sich selb gnug hatte / vnd ym sein leben wirckē
vnd leidē nicht nodt ware / das er damit frum o³
seligk^t wurd^t / dennoch hat er sich des alles geeuss^t
fert / vnd geperdet wie eyn knecht / allerley gethan
vnd geliden / nichts angesehen dann vnser bestes /
vñ also ob er wol frey ware / doch vmb vnser wils-
len ein knecht worden.

Izum. xxvij. Also sol eyn Christen mensch wie
Christus sein heubt vol vnd sat ym auch benugē
lassen an seinē glauben / den selben ymmer meren /
welcher sein lebē / frūmigkeit vnd seligkeit ist / der
ym gibt alles was Christus vñ got hat / wie dar-
oben gesagt ist. Vnd sant Paul Gal. i. spricht /
Was ich noch in dem corper lebe / das lebe ich yn
dem glauben Christi gottes son. Vnd ob er nun
gantz frey ist sich widerumb williglich einen die-
ner machen seinem nechsten tzu helffen / mit ym fa-
ren vnd handeln / wie got mit ym durch Christū
gehädelt hat / vnd das alles vmbsonst / nichts dar-
ynnen suchen / dan gotliches wolgefallen / vnd al

so dencken: Wolan mein got hat mir vnwürdigen
vordampfen mēschen on alle vordienst lautterlich
vmb sunst / vnd aus eyttel barmhertzigkeit geben /
durch vnd in Christo vollen reichthū aller frūmīg
keit vnd seligkeit / das ich hynfurt nichts mehr be
darff / den glaubē es sey also: Ey so wil ich solchē
vatter / der mich mit seinē vberschwenglichē gut
tern also vberschuttet hat / widerūb frey / frolich /
vnd vmb sunst thun was ym wolgefeller / Vnd ge
gen meinem nechsten auch werden eyn Christen /
wie Christus mir wordē ist / vnd nichts mer thū /
dan was ich nur sehe ym nodt / nützlich vnd selig
lich sey / die weil ich doch durch meinen glaubē als
les dings in Christo gnug habe. Syhe also fleus
set aus dem glauben die lieb vnd lust tzu got / vnd
auf der lieb eyn frey / willig / frolich lebē dē nech
sten tzu dienen vmb sunst. Dan tzu gleich wie vn
ser nechster nodt leydet / vnd vnsers vbrigē bedarff
also habē wir vor got nodt gelidē / vnd seiner gna
den bedurfft. Darūb wie vns got hat durch Chri
stū vmb sunst geholffen / also sollen wir durch den
leyb vnd seyne werck nit anders dan dem nechste
helffen. Also sehen wir wie ein hoch edles lebē sey
vmb ein Christlich leben / das leyder nun in aller
welt nicht allein niderligt / sonder auch nicht mer
bekant ist / noch gepredigt wurt.

¶ Zum acht vnd tzwentzigsten / Also lesen
wir Luce. ij. das die iunckfraw Maria tzu der
Kirchen ging nach den sechs wochen / vnd lyeß
sich reinigen nach dem gesetz / wie alle andere wei
ber / so sie doch nit gleich mit yn vnrein war / noch
schuldig der selben reinigūg / bedorfft yr auch nit.

D ij

*Mein vnsers lieb zu got
vmb sunst thun
also sollen wir durch den
leyb vnd seyne werck
nit anders dan dem nechste
helffen.*

Aber siethets auß freyer lieb / das sie die andere
weyber nicht vorachtet / sonder mit dem hauffen
blibe. Also lief sant Pauls sant Timotheum be-
schneyden / nicht das es nodt were / sonder das er
den schwach glawbigen Juden nit vsach gebe tzu
boszen gedancken / der doch widerüb Titum nit
wolt lassen beschneyden / da man darauff dringē
wolt / er must beschnitten sein / vnd were nodt tzu
der seligkeit. Vnnd Christus Math. xvij. Da von
seinen iungern ward die tzinf pfenning gefordert
disputirt er mit sant Peter / ob nit kunigs kinder
frey weren tzins tzugeben. Vnnd sant Peter / iha
sagt. Dyes er yn doch hyngehen an das meer / vnd
sprach / Auff das wir sie nit ergern / so gang hyn /
den ersten fisch den du fehest / den nym / vnd in sei-
nem maul wirstu findē einen pfennig / den gib fur
mich vnd dich. Das ist ein fein exempel tzu diser
lere / da Christus sich vnd die seinen freye kunigs
kinder nennet / die keynes dings bedurffen / vnd
doch sich vntterlesset williglich dienet / vnd gibt
den tzinf. Wieuil nun das werck Christo nodt
war / vnd dienet hat tzu seiner frümigkeyt oder se-
ligkeit / souil sein alle ander sein / vnd seiner Chri-
sten werck yn nodt tzu der seligkeyt / sonder sein als
les frey dienste / tzu willen vnd besserung der an-
dern. Also solten auch aller priester / closter vnnd
stift werck gethan sein / das eyn yglicher seynes
stands vnd ordens werck allein darumb thet / den
andern tzu willfaren / vnd seinen leib tzu regiren /
den andern exempel tzugeben auch also tzu thun /
die auch bedurffen yre leyb tzu tzuwingen / doch als
letzelt fursehen / das nit dardurch frum vnd selig
werden furgenommen werdt. Welchs allein des

glaubens vornugen ist. Auff die weysze gependt
auch sant Pauls Ro. xliij. vnnnd Tit. iij. Das sie
sollen weltlicher gewalt vntterthan vnnnd bereydt
sein/nit das sie dardurch frum werde sollen/son-
der das sie den andern / vnnnd der obrigkeyt damit
frey dienen/ vnnnd yren willen theten auß lieb vnnnd
freyheytt. Wer nun disen vorstant hette/der kunn-
leichtlich sich richten in die vntzelichen gepotten/
vnnnd gesetzen des Babsts/der Bischoff/der Clo-
ster/der stift/der furstenn vnnnd herren / die etlich
dolle prelaten also treyben/als weren sie nodt tzu
der seligkeyt/vñ heysen es gepot der kirchen / wie
wol vnrecht. Dan ein freyer Christ spricht also/
Ich wil fasten/beten/ditz vnnnd das thun / was ge-
potten ist/nicht das ichs bedarff / oder dardurch
wolt frum oder selig werden / sonder ich wills dē
Babst/Bischoff / der gemein / oder meinem mit-
bruder/hern tzu willen/exempel vnnnd dienst thun/
vnnnd leidenn / gleich wie mir Christus vil grosser
ding tzu willen than vnnnd geliden hat / des ym vil
weniger nodt ware. Vnnnd ob schon die tyrannen
vnrecht thun solchs tzu fordern / so schadets mir
doch nit/die weil es nit wider got ist.

¶ Zum. xxxix. Dyr auß mag eyn yglicher eyn
gewis vnter vnterscheidt nemen / vntter allen
wercken vnnnd gepotten / auch welchs blindt /dolle
oder rechtsinnige prelatē sein. Dan welchs werck
nit dahyn außgericht ist dem andern tzu dienen/
oder seinen willenn tzu leiden / so fern er nit tzuwing
wider got tzu thun / so ist nit eyn gut Christlich
werck. Daher kumpt das ich sorg/wenig stift
Kirchen/closter/altar/mess/testament / Christlich
sein/dartzu auch die fasten vnnnd gebet etlichen heis-

ligē sonderlich gethan. Dan ich furcht das in den
alle sampt eyn ycklicher nur das seyne sucht / vor/
meynendt damit sein sundt tzu bussen / vnd seligk
werdē. Welchs alles kumpt aus vnwissenheit des
glaubens / vnd Christlicher freyheit. Vnd etlich
plind prelaten die leut dahyn treyben / vñ solch we
sen preysen / mit ablas schmucken / vnd den glau/
ben nymmer mer leren. Ich rate dir aber wiltu et/
was stiffen / beten / fasten / so thu es nit der mey/
nung das du wollest dir etwas guts thun / sonder
gibs dahyn frey / das andere leut desselben genieß/
sen mugē / vnd thu es yn tzu gut / so bistu ein rech/
ter Christen: was sollē dir dein gutter / vnd gutte
werck die dir vbrig sein dein leyb tzu regiren vnd
vorsorgē / so du gnug hast am glauben / darynnē dir
got alle ding geben hat? Syhe also muessen gotes
gutter fliesen auß einē in den andern / vnd gemeyn
werdē / das ein yglicher sich seines nechstē also an
nem / als were ers selv. Auß Christo fliesen sie yn
vns / der sich vnser hat angenūmen in seinē leben /
als were er das gewesen das wir sein. Aus vns sol
len sie fliesen in die / so yr bedurffen. Auch so gar /
das ich muß auch meinen glauben vnd gerechtigt
keyt / fur meinen nechstē setzen fur gut / seine sundt
tzu decken / auff mich nemen / vñ nit anders thun /
dan als weren sie mein eygen / eben wie Christus
vns allen than hat. Sich das ist die natur der lie/
be / wo sie warhafftig ist: da ist sie aber warhafft
tig / wo der glaub warhafftig ist. Darüb gibt der
heilig Apostel der lieb tzu eygen. i. Cor. xiii. das
sie nit sucht das yre / sonder was des nechsten ist.

¶ Zum. xxx. Auß dē allen folget der beschluß /
das eyn Christen mēsch lebt nit in ym selv / sonder

22
einz. l. v. 1. 2.

in Christo / vnd seinem nechste : in Christo durch
den glaubē / im nechste durch die liebe : durch den
glaubē feret er vber sich in got / auß got feret er wi/
der vntersich durch die liebe / vnd bleibt doch ym
mer in got vnd gotlicher liebe. Gleich wie Chri/
stus sagt Johan. i. Ir werdet noch sehen den hy/
mel offen stehen / vnd die engel auff vnd absteigen
vber den son des mēschen. Sihe das ist die rechte
geistliche / Christliche freyheyt / die das hertz frey
macht / von allen sunden / gesetzen / vnd gepotten /
welch alle andere freyheit vbertrifft / wie der hy/
mel die erden. Welch geb vns got recht tzuorsten
vnd behalten. Amen.

W

Faint, illegible text, likely bleed-through from the reverse side of the page.

205



Jb 3942


ULB Halle 3
003 347 362



80







Von der freyheyt
eynes Christen
menschen.

Martinus Luther.

Zu Wittenberg: Im
XX. iar.

